

Komisija za reformu Mostara kojom predsjedava predstavnik međunarodne zajednice

Visoki predstavnik Paddy Ashdown i viši zamjenik visokog predstavnika Werner Wnendt su danas prisustvovali zvaničnom potpisivanju Obaveze glavnih predstavnika šest stranaka koje su zastupljene u Gradskom vijeću Mostara. Obaveza se odnosi na Komisiju koja je zadužena da pronađe trajno rješenje za restrukturiranje grada Mostara u skladu sa najboljom evropskom praksom.

Tokom posjete, visoki predstavnik je najavio sljedeći korak po pitanju restrukturiranja grada Mostara, a to je Komisija za reformu grada Mostara kojom predsjedava predstavnik međunarodne zajednice. Komisija će ispitati zakonske mjere koje su neophodne da bi se izvršila reforma institucionalnih struktura u Mostaru. Također će utvrditi ustavne i zakonske odredbe koje sprječavaju da Mostar funkcioniše kao moderan evropski grad i predložiti će zakonske i druge pravne instrumente da se ta situacija riješi.

Visoki predstavnik je imenovao gosp. Norberta Wintersteina za predsjedavajućeg Komisije bh. stručnjaka i predstavnika političkih stranaka koji su zaduženi da riješe pitanja vezana za ujedinjenje grada Mostara. Gosp. Winterstein je bio šef EU Odjela gradske uprave u Mostaru od 1994. do 1996. godine. Prilikom imenovanja gosp. Wintersteina za predsjedavajućeg Komisije, visoki predstavnik je istakao da "ni međunarodna zajednica ni zainteresovane strane iz Mostara ne mogu dozvoliti da Komisija ne uspije – ona mora uspješno završiti ovaj proces do kraja godine i dati pozitivne rezultate."

Svaka politička stranka zastupljena u Gradskom vijeću Mostara će u Komisiju imenovati svog pregovarača i pravnog stručnjaka.

Političke stranke su već predložile svoje predstavnike: SDA – Fatima Leho i Mirsad Ćeman, HDZ – Josip Merdžo i Ilija Filipović, SBiH – Safet Omerović i Šahbaz Džihanović, SDP – Željko Komšić i Husein Kapić, RZB – Adisa Vučina i Mile Kudić, SDU – Danijel Puvaca i Jusuf Jelin. Predsjedavajući Komisije je ovlašten da imenuje maksimalno pet stručnjaka za članove Komisije.

Komisija će izvještavati visokog predstavnika, Vijeće ministara, Vladu Federacije BiH, Vladu Hercegovačko-neretvanskog kantona te gradonačelnika i zamjenika gradonačelnika Mostara. Ovaj izvještaj treba biti izrađen do 15. decembra 2003. godine. Izvještaj će također uključivati novi nacrt Statuta grada Mostara. Principi uručeni prvoj Mostarskoj Komisiji će se koristiti kao smjernice za rad Komisije kojom predsjedava predstavnik međunarodne zajednice.

“Koristim ovu priliku da pozovem građane grada Mostara da se aktivnije uključe u izradu novog Statuta Mostara”, rekao je visoki predstavnik. “Mostarska Komisija je jedinstvena prilika da zainteresovane strane i građani ovoga grada predlože promjene i odluče o svojoj budućnosti.”